

CULLETTIVITA DI CORSICA

ASSEMBLEA DI I ZITELLI

3a SESSIONE STRASURDINARIA

REUNIONE DI L'11 DI GHJUGNU DI U 2025

N°2025/E3/010

DUMANDA A BOCCA FATTA DA I SCULARI DI A SCOLA DI GHISUNACCIA A U SGIO PRESIDENTE DI U CUNSIGLIU ESECUTIVU DI CORSICA

OGHJETTU : INCURASGI E DIMARCHJE ECOLOGICHE IN SCOLA MA DINO IN A CORSICA SANA.

O Sgiò Presidente,

Quist'anni, in a nostra scola, avemu rializatu una affrescu di u clima. St'affrescu ci hà permessu di capì megliu e cause è e cunsequenze assai pessime di i cambiamenti climatichi in Corsica è in altrò.

L'attività di l'omi anu certe volte, quand'elle sò approximate, abusive è scumpassionate, un'effettu più chè dannificu nant'à a qualità di u nostru ambiente è a preservazione di a biodiversità isulana.

L'esempi sò parechji in piaghja, per indettu in u duminiu di a mubbilità, postu ch'omu hè custrettu di piglià à spessu è ancu troppu a vittura per movesi, ch'un ci hè altri mezi di spiazassì. Ma si pò dinò ammentà quì quant'è in altrò opere massicce di defurestazione, d'urbanisazione spripusitata, tira avanti è tocca ...

Aldilà di i disgrasti ch'omu pò vede è valutà, st'azzione, ad altu livellu, pruducenu emissione impurtante di gasi ch'i, à e longhe, incauseghjanu a crescita di e timperature. L'avemu custatatu, annu per annu, face sempre di più caldu in a nostra scola, in la corte di recreaziò è ancu in casa nostra !

Di regula, ci vuleria à avvizzà per indettu a ghjente à piglià assai di menu e vitture. L'idea seria di sustene pratiche più rispettose di a natura, favurizendu quì altri mezi di mubbilità, vale à d'è trasporti ecologicchi, una di e suluzione maestre per vede sminuì l'emissione di gasi nant'à sta terra

Di listessu modu, seria propiu megliu d'accuncià nant'à u territoriu lochi affriscurati è sviluppà zone d'arburame per pruvà di fà calà e timperature inghjolocu. Per contu nostru, avemu ancu pensatu à suminà erba in e corte di recreaziò ; feria menu caldu chè in i spazii incatramati, è puderiamu ghjucà à fà cabriole è ... senza ferisceci !

Intantu, in listessu filu, vi vulemu pone unepoche di dumande di primura :

- Chì pudete fà per incuragì e cumune à pone arburà è à suminà erba in e corte di recreaziò ?
- Qualessi sò i vostri prugetti per favurisce i trasporti publichi, ecologichi, piste ciclabile è forse altre suluzione in Corsica ?
- Induve ne simu di i prugetti di prulungazione di a strada ferrata è di a ghjunta di u trenu in Piaghja orientale è perchè micca sin'à Ghisunaccia Gara ?

Vi ringraziamu.